



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM
Nr.900, Datë 17.05.2022

**“PËR DHËNIEN E DISA REKOMANDIMEVE ENTIT RREGULLATOR TË UJIT
MBI APLIKIMIN PËR MIRATIMIN E NIVELIT TARIFOR PËR NDËRMARRJEN
UJËSJELLËS KANALIZIME KONISPOL SHA”**

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Rezana KONOMI	Anëtar
Znj.	Adriana BERBERI	Anëtar
Z.	Durim KRAJA	Anëtar

Në mbledhjen e tij të datës 17.05.2022, shqyrtoi çështjen me:

Objekt: Dhënie e disa rekomandimeve Entit Rregullator të Ujit (ERRU) mbi aplikimin për miratimin e nivelit tarifor për ndërmarrjen Ujësjiellës Kanalizime Konispol SHA.

Bazë ligjore: Neni 24, germa (d) dhe (f); neni 26; neni 69 dhe 70 të ligjit nr. 9121, datë 28.07.2003 “Për mbrojtjen e konkurrencës”.

Komisioni i Konkurrencës pas shqyrtimit të:

- Relacionit mbi aplikimin për ndryshimin e nivelit tarifor për Ujësjiellës Kanalizime Konispol SHA.

VËREN SE:

1. ERRU me nëpërmjet shkresën nr. 294 prot., datë 01.07.2021, informon Autoritetin e Konkurrencës mbi Projekt-vendimin e Komisionit Kombëtar Rregullator (KKRR) nr. 536 prot., datë 30.12.2021, shoqëruar me relacionin shpjegues përkatës, se ka përfunduar procedurën e shqyrtimit dhe miratimit të aplikimit të ndërmarrjes Ujësjiellës Kanalizime Konsipol SHA për miratimin e tarifave të shërbimit të furnizimit me ujë, të cilat konsistojnë në ligjërimin e nivelit të tarifave të këtij shërbimi për të tre kategoritë e klientëve.
2. Bazuar në ligjin nr. 8102, datë 28.03.1996 “Për kuadrin rregullator të sektorit të furnizimit me ujë dhe largimit e perpunimit të ujërave të ndotura”, i ndryshuar, si dhe aktet nënligjore të dala në zbatim të tij, ERRU nëpërmjet strukturës së saj vendimmarrëse, Komisionit Kombëtar Rregullator, miraton çmimet dhe tarifat e shites së ujit, me shumicë dhe pakicë,

tarifat për ujërat e përdorura dhe tarifat e trajtimit të tyre, afatet dhe kushtet e shërbimit, të ofruara nga operatorët, që sigurojnë ujë për konsum publik.

3. Bazuar në parashikimet e nenit 21 të ligjit nr. 8102, datë 28.03.1996 “Për kuadrin rregullator të sektorit të furnizimit me ujë dhe largimit e perpunimit të ujërave të ndotura”, i ndryshuar, ERRU duhet të mbrojë konsumatorët nga çmimet monopol, të inkurajojë efikasitetin ekonomik brenda sektorit, duke dhënë sinjale të sakta të çmimeve në lidhje me ofertën e tepërt apo të paktët, të pasqyrojnë ndryshimet në kosto dhe në aspekte të tjera midis kategorive të klientëve dhe llojeve të shërbimit dhe të aplikojë politika rregullatore të subvencionimit ndërmjet këtyre kategorive.
4. Bazuar në parashikimet e nenit 21 të ligjit nr. 8102, datë 28.03.1996 “Për kuadrin rregullator të sektorit të furnizimit me ujë dhe largimit e perpunimit të ujërave të ndotura”, i ndryshuar, ERRU ka miratuar “Metodologjinë për vendosjen e tarifave për shërbimin e furnizimit me ujë dhe largim e perpunimin e ujërave të ndotura”. Bazuar në këtë metodologji shqyrtimi i aplikimit për ndryshim tarife fillon me analizën e kostove të operimit dhe mirëmbajtjes, të cilat duhet të jenë të justifikueshme, si dhe analizën e treguesve të performancës. Rritja e tarifave duhet të bëhet gradualisht në vitet në vazhdim, me kusht që çdo rritje të pasqyrohet në përmirësimin e performancës së shërbimeve. Tarifat e reja duhet të jenë të orientuara drejt kostove të justifikuar, rritjes së efikasitetit, vendosjen e objektivave përkatës për përmirësimin e tyre, si edhe verifikimin e kriterit të përballueshmërisë së pagesës së faturës së shërbimeve nga konsumatorët. I gjithë procesi duhet të shoqërohet me transparencë ndaj publikut i cili duhet të informohet në një seancë dëgjimore paraprake mbi tarifat e reja që shoqëria synon të aplikojë në propozimin e saj.
5. Ndërmarrja Ujësjiellës Kanalizime Konispol SHA është licencuar me vendimin e KKRR nr. 39, datë 01.06.2018, i ndryshuar, për të kryer shërbimin e furnizimit me ujë të pijshëm me zonë shërbimi Bashkinë Konispol.
6. Ndërmarrja Ujësjiellës Kanalizime Konispol SHA aplikon për miratimin e tarifave të furnizimit me ujë për herë të parë pranë ERRU pas licencimit dhe kërkon të ligjërojë tarifat që aktualisht aplikon, si dhe të krijojë gradualisht qendrueshmërinë finansiare për shoqërinë pasi të ardhurat aktuale nga tarifat arrijnë të mbulojnë vetëm 59% të kostove të operimit dhe të mirëmbajtjes.
7. Informacioni mbi aplikimin si dhe vendimi i KKRR nr. 536, datë 30.12.2021 “Për fillimin e procedurës për shqyrtimin e aplikimit për ndryshim të tarifave të shoqërisë Ujësjiellës Kanalizime Konispol”, janë bërë transparente në faqen zyrtare elektronike të ERRU-së.
8. Ndërmarrja Ujësjiellës Kanalizime Konispol SHA ofron shërbimin e furnizimit me ujë me treguesit e performancës, përkatësisht: mbulimi me shërbim furnizimi me ujë në nivelin 94.9% të popullsisë në zonën e juridiksionit të saj, uji pa të ardhura në nivelin 35.02%, norma korrente e arkëtimit në 98.5%, operon me 10.9 staf/1000 lidhje dhe me të ardhurat e gjeneruara mbulon 59 % kostot e O&M.

9. Niveli tarifor i propozuar nga ERRU, është në të njëjtat nivele me ato që ndërmarrja Ujësjellës Kanalizime Konispol SHA propozon, duke synuar dhe përmbushur kriteret e mëposhtme:
- Aplikimin e tarifave të miratuara nga ERRU dhe rregullimin e tyre në të gjithë zonën.
 - Përmirësimin e Treguesit UPA në nivelet 30.3 % staf/1000 lidhje UK, nëpërmjet vlerësimit në mënyrë të saktë të ujit të prodhuar dhe të faturuar bazuar në rritjen e numrit të lidhjeve, konsumit mesatar mujor dhe parashikimit të veprimtarisë së ndërmarrjes për reduktimin e humbjeve. Për përmirësimin e mëtejshëm të treguesit, ndërmarrja duhet të ndërmarrë aksionin për eliminimin e lidhjeve të paligjshme në rrjetin shpërndarës dhe riparimin në kohë të defekteve në rrjet.
 - Mbulimin e kostove të operimit & mirëmbajtjes deri 56.4% me të ardhurat e gjeneruara nga aktiviteti e të tjera, të rillogaritura bazar në rritjen e numrit të lidhjeve dhe konsumit mesatar mujor 12m³, dhe me kostot e rivlerësuara për shkak të rritjes së çmimit/njësi të energjisë elektrike, duke marrë për bazë çmimin mesatar/njësi të vitit 2022.
 - Përmbushjen e kriterit të përballushmërisë për faturën mujore të konsumatorit familjar me matës dhe pa matës.
10. ERRU e gjykon të argumentuar nivelin tarifor të propozuar nga ndërmarrja Ujësjellës Kanalizime Konispol SHA. Për shkak edhe të ndjeshmërisë së konsumatorit ndaj rritjes së çmimeve këtë periudhë, në këtë aplikim nuk u konsiderua një variant me tarifa të unifikuara për të gjithë zonën apo aplikimi i një tarife fikse për disponibilitetin e shërbimit.
11. Për vlerësimin e kostove së arritshme të një ndërmarrje UK, rregullatori përdor si bazë kostot sipas shërbimeve, duke siguruar një nivel të arsyeshëm rritje tarifash në raport me shërbimin e ofruar si dhe të cilësisë së shërbimit. Kjo ka sjellë vendosjen e tarifave duke siguruar që konsumatorët të paguajnë çmimin e duhur për produktin dhe shërbimin që u ofrohet.
12. ERRU në analizën ekonomiko-financiare të saj, ka analizuar drejt dhe ka marrë në konsideratë vetëm kostot e justifikuara të paraqitura nga ndërmarrja Ujësjellës Kanalizime Konispol SHA, të cilat përcaktojnë nevojat për të ardhura të ndërmarrjes si faktori bazë përcaktues në procesin e miratimit të tarifave si dhe ka përcaktuar objektivat e performancës tekniko-financiare të shoqërisë.
13. Për përmirësimin e performancës financiare dhe të cilësisë së shërbimeve ndaj konsumatorëve, ndërmarrja Ujësjellës Kanalizime Konispol SHA, duhet të aplikojë tarifa të orientuara drejt kostos së shërbimeve.

PËR KËTO ARSYE:

Komisioni i Konkurrencës, bazuar në nenin 24, germa (d) e (f), nenin 69 dhe nenin 70 të ligjit nr. 9121, datë 28.07.2003 “Për mbrojtjen e konkurrencës”,

VENDOSI:

- I. T’i rekomandojë Entit Rregullator të Ujit, që tarifat e ndryshuara që do të miratohen nga ERRU për ndërmarrjen Ujësjetës Kanalizime Konispol SHA, të jenë të orientuara drejt kostos së shërbimeve, të jenë të bazuara në parimin e mosdiskriminimit dhe të jenë transparente në faqen e ERRU-së.
- II. Ngarkohet Sekretari i Përgjithshëm për njoftimin dhe ndjekjen e zbatimit të këtij vendimi.

Ky vendim hyn në fuqi menjëherë.

KOMISIONI I KONKURRENCËS